

修養量

順治八年十一月廿五到

本揭對同

欽命總督宣大岢等處軍務兼理糧餉兵部左侍郎兼都察院右副都御史佟養量

為甄別原有往例謹請

旨定奪以便遵行事據大同道僉事呂逢春呈問得

壹名潘忠年肆拾捌歲係北京人狀招忠奉部

推授大同右衛所千總經管尖丁銀兩比有在

官生員許承祚呂芳聲賈天寵等廩糧并在官

本衛千總周祐薪紅等項銀兩例應尖丁銀內

動給比忠只合上緊照例催給為是就不合不

守官歲日以嫖賭為事不行追給以致許承祚

等并周祐遂以私指丁銀等情具呈大同道在

案順治柒年文武各官例應甄別蒙總督佟軍

門

題稱據大同道臣呂逢春呈送大同右衛所千總  
潘忠壹伍年姜林貳賊逆亂拾貳月初伍日事  
變潘忠為逆偽官巡捕至本月貳拾陸日謝事  
雖為逆任事未久然已居然受偽職矣史業隆  
証千總歐鳳翔有呈在案壹本官嫖賭喪檢闔  
學生員許承祚呂芳聲賈天寵等公呈請斥在  
案壹本官於本年貳月間冊報尖丁銀已給千  
總周祐薪紅等項迺私指不給致周祐具呈見  
今追給此壹官者以嫖賭亡賴之徒冒

朝廷徵餉之職花柳樂身儒林切齒且地方叛變而  
反受偽官名曰巡捕雖云數日悔罪即罷失節  
非忠難容于任伏乞



勅部覆核等因順治捌年捌月初玖日題貳拾日奉  
聖旨吏兵貳部知道欽此欽遵抄部送司案呈兵部  
該臣等看得除文職聽吏部議覆並所薦紀錄  
外至千總潘忠甘受偽職私指丁銀應革職行  
該督按拏問具奏等因題奉

聖旨是徐夢熊潘忠都着革了職該督按拏問具奏  
欽此欽遵備咨軍門案行大同道轉行大同府  
移牒理刑廳即將大同右衛所千總潘忠事內  
原叅有名人犯逐壹通提到官研審如律通詳  
兩院會

奏施行該推官劉宏譽票提有名人犯到官審得  
犯官潘忠供稱壹件姜林貳賊變亂勢如太山

壓卵敢不依從原不得已從逆後大兵既至隨  
即投誠訖研訊在官史業隆供吐相同壹件審  
擬在官許承祚等供稱潘忠不守職業嫖妓賭  
博是實原因廩糧勒指不給致激揭呈等情壹  
件審擬千總周祐供稱原因本職薪紅等項應  
于尖丁銀內給發潘忠私指不與致祐具呈又  
擬潘忠供稱始因錢糧奉文支銷殆盡繼將所  
有拖欠催追與過周祐柒年薪紅銀陸個月當  
堂質審周祐亦供相同再三研審前情是的該  
推官劉宏譽看得潘忠無行武弁也值姜逆之  
亂不能挺身自立乃望風而靡雖能改過投誠  
已非無瑕之璧矣乃復不脩官箴嫖賭爲事目

中已無法紀研審再四生員之廩糧周祐之俸  
薪種種勒措遂致物議紛騰雖無入己之贓擬  
杖不枉壹議得潘忠所犯合依不應得爲而爲  
之事理重者律杖捌拾係革職武弁審有力照  
例納米折銀贖罪完日合發寧家壹照出潘忠  
該官紙壹分析銀叁錢伍分又該贖罪米捌石  
每石折銀伍錢共肆兩追貯官庫解部公用緣  
由招解到府覆審無異該知府胡文煒看得潘  
忠居官不職物議沸騰研審明確按律究擬夫  
復何辭但事犯

赦前應開一面用廣

皇仁將忠問罪招解到道覆審無異該本道僉事呂

逢春看得潘忠庸憊下弁罔畏官箴從叛失節  
嫖賭喪行逋薪廩而未給致物議以疊騰雖無  
入己之贓難免不職之咎依律杖懲于法允宜  
但事在

赦前姑開一面以廣

皇仁等因具招到職該職看得千總潘忠名稱職官  
實類市棍樂章臺而不惜體面臨賭場而甘污  
形踪勒指廩糧柴薪銀兩本於廢事招怨附叛  
甘受巡捕偽職雖云悔罪豈曰澀而不溜姑擬  
一杖以示懲儆但屢奉解網之

詔罪犯

恩赦之前應請




聖裁者也職謹會同宣大按臣薛陳偉合詞具

題伏乞

勅部議覆事關刑名字多逾格統希

聖鑒施行爲此除具

題外理合具揭須至揭帖者



順治捌年拾貳月

日



